

BERITA » Nasional
Selasa, 15 Ogos 2017 | 6:08pm



ABDUL Rahman (tengah) bersama Mohd Uzir (dua dari kiri) ketika majlis Pelancaran Malaysia in Figures (MIF) 2017 di Pusat Konvensyen Antarabangsa Putrajaya (PICC). - Foto Ahmad Irham Mohd Noor

Jabatan kerajaan diminta kongsi data statistik

Oleh Samadi Ahmad |

PUTRAJAYA: Semua kementerian dan agensi kerajaan diminta berkongsi hasil dapatan dengan **Jabatan Perangkaan** bagi menyelaraskan data statistik yang lebih menyeluruh lagi tepat.

Menteri di Jabatan Perdana Menteri, Datuk Seri Abdul Rahman Dahlan, berkata statistik penting sebagai panduan bagi sesuatu keputusan atau pelaksanaan supaya ia bermanfaat dan memenuhi keperluan semasa kumpulan sasar.

"Malah, perkara ini sudah dimaklumkan pada peringkat Kabinet, namun banyak jabatan dan agensi kerajaan sukar untuk berkongsi data disebabkan kekangan prosedur operasi standard (SOP) yang diamalkan masing-masing.

"Maklumat ini akan membolehkan Jabatan Perangkaan memperoleh lebih banyak data statistik yang lebih tepat dan tersusun bagi memenuhi keperluan penduduk Malaysia," katanya pada sidang media pada Majlis Pelancaran 'Malaysian in Figures' (MIF) 2017, di sini hari ini.

Yang turut hadir, Ketua Perangkawan Malaysia, Dr Mohd Uzir Mahidin; Timbalan Ketua Perangkawan Program Ekonomi, Azahari Mohd Raslan; dan Timbalan Ketua Perangkawan Program Sosial/Demografi, Nazaria Baharudin.

Malaysian in Figures memuatkan perbandingan fakta utama bagi Malaysia dengan negara terpilih lain termasuk perbandingan penduduk, pertumbuhan keluaran dalam negara (GDP), kadar penyertaan tenaga buruh serta kadar inflasi yang membolehkan pengguna ataupun pelabur membuat unjuran lebih tepat.

Abdul Rahman menegaskan, kerajaan perlu memastikan rakyat memahami analisis dan angka yang dikemukakan itu terutama golongan muda, supaya mereka memahami serta mendapat persepsi sebenar mengenai kedudukan sosio ekonomi negara berikutan hasil usaha kerajaan.

Abdul Rahman juga mahu terbitan MIF dimanfaatkan kerajaan dan rakyat sebagai persediaan menempuh era Revolusi Perindustrian Keempat (Industri 4.0).

"Kita sudah berbincang untuk mengedarkan statistik ini ke peringkat daerah dan pihak berkuasa tempatan (PBT) supaya mereka boleh membuat keputusan lebih cepat lagi tepat berdasarkan butiran semasa di kawasan masing-masing.

"Statistik tempatan ini sudah dikeluarkan secara berperingkat dan dijangka selesai pada penghujung November ini," katanya.